

Protocol dalla 74avla radunonza generala dall'uniun da dunnas Laax ils 5 da november 2023 allas 19.00 uras, Aula Grava

Tractandas:

1.	Beinvegni	1
2.	Elecziun da duas dumbravuschs	1
3.	Approbaziun dil protocol 2022	1
4.	Rapports annuals	1
5.	Rendaquen 2022 e preventiv 2023	3
6.	Program annual.....	4
7.	Fixar la contribuziun annuala	5
8.	Revisiun dils statuts – Art.3c	5
9.	Honoraziuns	6
10.	Elecziuns	6
11.	Varia	7

1. Beinvegni

La presidenta Seraina Cathomen fa in cordial beinvegni alla 74avla radunonza generala dall'uniun da dunnas. 75 commembras ein presentas. Era in cordial beinvegni fa ella a Sarah Caminada, ella translatescha la radunonza generala en lungatg da simbols per nossa commembra Patricia Nay. Plinavon fa ella attenta las novas commembras, ch'ellas astgan uonn aunc buca votar.

Seperstgisadas per questa sera ein tut las dunnas, tenor la gliesta archivada sco annexa tier il protocol.

➤ Mira gliesta d'annunziats e d'absenzas RG 2023

2. Elecziun da duas dumbravuschs

Las dunnas Simona Camathias e Lea Steiner vegnan elegidas sco dumbravuschs.

3. Approbaziun dil protocol 2022

Il protocol dalla radunonza generala digl onn 2022, ei staus online sin la pagina da web www.dunnas-laax.ch ni ha saviu vegnir retratgs tier la presidenta.

Il protocol vegn approbaus unanimamein.

4. Rapports annuals

A) Rapport dalla presidenta:

Seraina Cathomen dat ina survesta sur dil curriu e passau egl onn 2022/23. Sco emprend, vegn mussau ina presentaziun cun musica per dar ina survesta digl onn 2022/2023 en maletgs.

Al til da latiarnas han uonn 90 affons priu part. Ils affons han grond plascher da mussar lur latiarnas quella sera. Allas mussadras da scoletta, alla menadra dalla Termagliera sco era a Nadia Cathomas e sias gidontras in grond engraziament per tut la lavur.

Era in grond Dieus paghi a Stefanie Kälin, Natalia Gliott, Regula Caduff e Mirjam Derungs per organisar la biala devoziun d'advent ch'ei vegnida embellida dil cant da Maria Catrina Albin. Era ad ella engraziell fetg.

Gl'advent dils seniors ei era uonn vegnius menaus atras, denton buca dalla suprastonza. Niev havein nus las dunnas Flurina Cantieni, Loredana Cathomen e Patrizia Hänggi che organiseschon quei per nus. Igl ei stau ina biala sentupada cun nos seniors. Ellas ein vegnidas sustenidas da Susanne Kaib e Corina Walser. In grond engraziament a tuttas.

Uonn ha il viadi da seniors menau nus a Lucerna. Ensemen cun 65 seniors havein nus astgau guder in bellezza di ch'ei vegnius organisaus da Marlene Gliott. In viadi da seniors dat adina fetg bia dad organisar. Marlene ha fatg quei grondius. Duront il viadi han Seraina Gschwend e Seraina Cathomen segidau. Nus engraziein alla vischnaunca politica pil sustegn. Igl ei in fetg bi eveniment nua ch'ins astga schenghegiar temps in a l'auter. E quei ei en nos temps il pli bi ch'ins astga far. Engraziell per tut las fatschas rientas.

Noss'uniun ha astgau menar atras duas buorsas d'artechels d'affons. Igl ei stau in grond success e nus havein astgau vender en tut 2400 artechels che han aschia anflau in niev plaz enstagl da vegnir fiers naven. Cun quellas occurrenzas savein nus mintgamai era sustener finanzielmein organisaziun, sco p.ex. igl agid d'unviern ni la casa da dunnas dil Grischun. Milena e Nathalie organiseschon a moda perfetga las buorsas. Ad ellas e tut las gidontras, senza las qualas ei mass buca da menar atras ina buorsa, in grond engraziament.

Nos suentermiezdis da seniors han sco adina giu liug duas gadas el meins. Corina Walser procura che nos seniors san guder ils suentermiezdis da jass e troccas. Ella survegn agid da Ramona Walser e Kathy Wyss. Engraziell fetg ad ellas persuerter.

In da nos gronds eveniments digl onn vargau era segirafranc la fiasta digl emprem d'uost e dalla notg da schlager en tenda. Vos haveis dau tut ed era grondiusas. Nus savein mo engraziari a vos da tut cor persuerter.

In grond engraziament va era a Silke Palmieri, ch'ei sedecarada prompta da vegnir egl OK. Ella ha fatg ina super lavur ed ei ha fatg grond plascher da luvrar cun ella. Engraziell fetg.

In grond engraziament va era alla vischnaunca ed alla gruppa da lavur. Principalmein la gruppa da lavur cun Paul Toggenburg han segidau fetg ed eran adina cheu sche nus duvravan aunc enzatgei.

Las cefras tschontschon per ellas. Nus havein ensemen cun il chor viril fatg in gudogn da frs. 32'000.00. Quei havein astgau repartger cun la clav 45% e 55% ed aschia havein nus survegniu frs. 17'600.00 en nossa cassa dall'uniun.

Nus engraziein da cor al chor viril per la buna collaboraziun. Tuts han luvrau fetg ed eran prompts da segidar nua ch'ei duvrava. Ei drova tuttas – naven dil survir, sur il schubergiar sco era per mirar dil beinstar dils gidonters.

Mo nus havein era bia dunnas che fan lavurs per nus, che negin vesa. La Simona Camathias mira per nossa pagina d'internet e tut las medias sozialas, Sabrina mira dils vestgius dall'emprema communiun e che tut ils affons seigien sevestgi, Marietta Cathomas Manetsch fa per nus las translaziuns romontschas, Regula Caduff zambregia mintg'onn il tschupi d'avent per en baselgia e Renata Arpagaus organisescha suenter la messa d'uncziun il caffè e la petta. A tuttas era cheu in grond engraziament.

L' actuara Sabrina engrazia alla presidenta per siu rapport presidial e per sia lavur preciosa. Igl uffeci da presidenta cumpeggia massa differentas caussas dad organisaziun, contact anovians denton era intern ell'uniun. Ella fa quella lavur cun fetg grond engaschi. Il rapport vegn approbaus cun in grond applaus.

B) Rapport dalla termagliera

Nossa menadra da termagliera Sabrina Camathias dat ina investa el mintgadi dalla termagliera.

Inagada el meins ha la termagliera liug giuadora, nua ch'ei vegn tedlau historias, encuretgi animals ed intercuretgi la natira, denton era cultivau ils contacts tier ils auters pignets. Ils affonets visetan inagada ad onn il bein puril Scalins si Falera. La finiziun digl onn da termagliera ha liug giuadò. Uonn essan sentupai sil plaun dil lag. Sabrina muossa sco finiziun in canaster plein nanins da crappa ch'ils affons han zambergiau. Quels vegnan purtai anavos egl uaul e selegnan da vieseta.

Wunderfitz + Redeblitz

Sabrina Camathias dat era ina survesta dils cuors da romontsch che vegnF organisaus dalla fatschenta Wunderfitz&Redeblitz.

Uonn ha ei dau quater gruppas da romontsch. Treis en las localitads dalla termagliera, per la vegliadetgna da scoletta e termagliera, plinavon ina gruppa ella canorta Igniv. Claudia Pfister da Sagogn meina cun grond anim ils cuors.

Ils cuosts vegnan sco tochen da cheu surpri dil cantun GR, dalla Vischnaunca politica e dalla Fundaziun Pro Laax. Ina pintga cumpart resta tier ils geniturs.

5. Rendaquen 2022 e preventiv 2023

La cassiera Rita Arpagaus rapporta detagliadamein dil quen da gudogn e sperdita digl onn vargau. Tier entginas posiziuns cun midadas visavi il preventiv, dat Rita in sclariment supplementar:

- Niev post Moviment 60+: Cheu vegni a dar l'auter onn in minus, cunquei che la summa vegn daniev pagau en pigl entir onn (frs. 5'755.00).
- Tier las activitads seresulta in recav da bien frs. 2'600.00 ord las duas buorsas d'artechels d'affons.
- Nossas activitads sco devoziun d'Advent, bowling etc. han duvrau expensas da rodund frs. 1'900.00.
- Il viadi dall'uniun ei budgetaus cun frs. 6'500.00.
- Ei ha dau in grond gudogn da frs. 17'600.00 alla fiasta naziunala.

Aschia seresulta in gudogn total da frs.25'457.70.

Cassa:	frs. 846.51
Conto da spargn Raiffeisen:	frs. 52'305.36
Total	frs. 53'151.87
Facultad ils 31-10-2022	frs. 27'694.17
Facultad ils 31-10-2023	frs. 53'151.87
Gudogn	frs. 25'457.70

Ei dat neginas damondas supplementaras alla cassiera Rita e la presidenta Seraina engrazia alla cassiera per sias explicaziuns.

A) Rapport dallas revisuras da quen

La revisura Kathy Wyss attesta che Petra Killias ed ella hagian controllau ensemen cun la cassiera ils documents. Il quen dall'uniun da dunnas seigi menaus schuber e tuttas quittanzas seigien avon maun. Ella engrazia alla suprastanza per lur lavur e propona dad approbar il quen. Il quen digl onn 2022/23 vegn approbaus cun vusch unanima e cun in ferm engraziament alla cassiera.

B) Presentaziun dil preventiv

Nossa cassiera Rita presenta il preventiv pigl onn 2024 e fa suandontas explicaziuns:

- Niev post movient 60+ vegn menaus separadamein. Avon era quei post cumprius ellas activitads. frs. 1'000.00 surpren l'uniun.
- Ils Flyers ein aunc buca a fin ed aschia che quei post resta vinavon el preventiv.

- Il post Homepage/Software ei vegnius augmentaus sin frs. 500.00 cun quei ch'ei dat adina pli aults cuosts fix.

Approbazion:

Il quen da gudogn e spertida digl onn 2022/23 ed il preventiv 2023/24 vegnan approvai unanimamein.

6. Program annual

La presidenta Seraina sco era la suppleanta Marlene presentan il program annual per igl onn 2023/24, il qual prevesa occurrenzas en la rama sco ils onns vargai.

Termins fixai:

El program annual dat ei termins ch'ei gia fixai. Uonn ein quei ils suandonts:

- 29.11.2023 Schubergiar la baselgia
- 03.12.2023 Advent dils seniors
- 13.12.2023 Til da latiarnas
- 15.12.2023 Devoziun d'advent e messa per las defunctas
- 17.02.2024 Claudio Zuccolini ella La Fermata
- 15.03.2024 Messa cun uncziun
- 13.04.2024 Buorsa d'artechels d'affons primavera
- 06.06.2024 Viadi dils seniors
- 21.09.2024 Buorsa d'artechels d'affons atun

Seraina menziunescha che nus havein gia bigliets pigl eveniment cun Claudio Zuccolini ella La Fermata. Els cuostan frs. 35.00 per persuna. Tut tgi che ha tschaffen dad esser dalla partida astga s'inscriver alla fin dalla radunonza ella gliesta. Informaziuns leutier suondan aunc per chat.

Marlene declara tgei occurrenzas ch'ei schiglioc aunc planisadas pigl onn vegnent:

- Nanins da Nadal (nus fagein in plascher ina a l'autra). Ella fa attenta, che tuttas dunnas survegnan l'jamna proxima informaziuns pli detagliadas. Sabrina Camathias stat denton bugen a disposiziun per damondas.
- Bad RagARTz – ei ina occurrenza d'art che nus mein a mirar en cuminonza la primavera
- Il cuors "Beckenboden" vegn organisau da Corinne Rietmann. Detagls suondan.
- Cuors dad E-Bike. Cunquei ch'il cuors ha giu grond interess igl atun, havein sedecidiu da menar atras el aunc inagada la primavera.
- Referat sur dil tema far uorden. En quei referat survegn mintgina tips sco ins sa s'organisar a casa per far e tener uorden.
- Il viadi dall'uniun ei planisau per igl atun. Informaziuns pli detagliadas suondan pli tard egl onn.
- Era pigl atun eis ei planisau da far ina guida da bulius cun ina tscheina communabla ella tegia d'uual
- Ed il december 2024 visitein comunabla in marcau da Nadal.

Tgei ch'ei era aunc planisau: Ina sera da kino, Bowling ed in di da skis cun Heidi Bösch. Era ils suentermiezdis da seniors vegnan vinavon organisai ed il program moviment 60+ va medemamein vinavon.

Seraina engrazia a Marlene per las declaraziuns. Ella fa attenta, che las gliestas da s'inscriver per ina u l'autra occurrenza ein messas ora sin la meisa davontier. Leu astgan tuttas bugen s'inscriver suenter radunonza generala cu mintgina vegn a pagar la contribuziun annuala.

Seraina declara, ch'era la supraponza ha differenzas occurrenzas ch'ellas prendan part. Quei ein las sentupadas dallas uniuns da dunnas dalla Surselva, mo era alla radunonza generala dall'uniun cantunala dallas dunnas essan dalla partida. Cuors dall'uniun svizzer da dunnas (SKF) vegnan medemamein frequentai.

Per igl onn 2024 eis ei era planisau dad organisar ina sentupada cun las presidentas anteriuras. L'emprema ch'ei menziunada els documents ei digl onn 1966 – e cun quei che tuttas vivan aunc a Laax, ei quei ina bun'occassiu da sebratar. Naturalmein vegnin buca ad emblidar da far ina fotografia.

La suprastonza pren era part alla sesida da coordinaziun ed agl apert per ils novs domiciliai a Laax. Sesidas havein 3-5 ad onn, mo bia va era per chat ni e-mail.

Seraina muossa sco finiziun ina folia che duei mussar sco mintgina ei cheu per tgella e che nus savein mo communablamein contonscher enzatgei.

Seraina supplichescha las suandontas dunnas da star sin peis: Corina Walser, Kathy Wyss, Ramona Walser, Stefanie Kälin, Natalia Gliott, Regula Caduff, Mirjam Derungs, Loredana Cathomen, Flurina Cantieni, Patrizia Hänggi, Milena Matter, Nathalie Sgier, Simona Pohle, Marina Schuoler.

Ella declara, che buca mo la suprastonza drova igl agid dallas commemoras, mobein era tut quellas dunnas che stattan ussa sin peis. Ellas drovan per tut quei ch'ellas fan era sustegn ed agid. Per quei eis ei impurtont che mintgina lavura e segida. Aschia savein nus porscher ton e far ina massa bialas e bunas caussas ensemen. Engrazia fetg persuerter.

Seraina surdat il plaid a Marlene, cun quei ch'ella haveva d'ina sesida da suprastonza declarau quei dalla cuminonza fetg bien.

Marlene declara ch'igl ei in privilegi dad astgar star e viver en in vitg sco Laax. Ella ei dil meini che nus essan ina cuminonza fetg speciala. Indigens pli vegls che han ina gronda savida dils usists e dalla historia, giuvens indigens, indigens ch'ei turnai, maridai vitier mo era pli vegls che lessan guder lur sera sontga en quei bi vitg. Buca biaras vischanuncas san porscher aschia ina diversidad en cultura, lungatg e vivier in cun l'auter.

Quella variaziun stuein nus nazegiar per saver organisar tut nossas occurenzas. Ensemen essan nus fermas!

Quei vul denton era dir che las giuvnas dalla cuminonza segidan tier occurenzas per giuven sco era per ils seniors mo medemamein duvrein nus ils mauns da nossas senioras da segidar cun occurenzas cun affons ni per las giuvnas. Mintga maun ei impurtonts!

Ins astga era mai emblidar, ch'ei va buca mo per il luvrar. Ei va era per sentupar, per dar ina paterlada, per prender d'enconuscher novas personas, ch'ins prendess altruisa mai d'enconuscher.

Che quei ei ina biala e buna experientscha, sa ella mo sincera ord atgna experientscha.

Seraina engrazia a Marlene e declara ch'ei mondi exact per quei. Ord quei motiv havein mes si nossas gliestas. Fagei aschi bien e mirei sisu e segidei. Engraziell fetg.

Corina Walser enquera aunc agid per ils suentermiezdis da seniors. Sch'enzatgi havess peda duei far aschi bien e s'annunziar directamein tier ella suenter la radunonza.

Uonn havein tschentaun si in Flipchart. Sin quel haveis vus la pusseivladad da scriver si ideas per occurenzas ni auter che vus havessas tschaffen da far. Mintgina astga era aunc far in steh davos in'idea, percass ch'ella havess era interess da far ina tala occurenza. Aschia havein ina survesta e savein organisar quei forza igl onn 2025.

7. Fixar la contribuziun annuala

La suprastonza fa la proposta da restar sin frs. 20.00 contribuziun annuala per commembra.
La proposta vegn acceptada unanimamein.

8. Revisiun dils statuts – Art.3c

Seraina informescha ch'ils status ein vegni midai igl onn 2019. La suprastonza ha ils davos onns denton viu ch'igl artechel 3c porscha enquala sfida. Ils temps ein semidai e biaras dunnas vegnan per cun 65 onns e varga ell'unien

da dunnas. Ed igl ei curios, che quellas dunnas d'aventan suenter 5 onns gia commembras d'honor e survengan aschia era in matg fluras. Medem sco nossas dunnas che lavuran gia dapi varga 30 onns cun e per l'uniun.

Perquei havein nus en suprastanza discussiunau ed essan dil meini da strihar quei artechel. Aschia dess ei naven dad immediat neginas honoraziuns pli. Mo ei fuss en nos egls pli gest.

Interessant ei en quei connex, ch'igl ei exactamein 50 onns anavos che quei artechel ei vegniu publicaus els statuts.

Nus havein oz aunc 3 dunnas che survegnan la honoraziun commembra d'honor. Silsuenter havessan per 10 onns neginas dunnas ch'ei gia tons onns ell'uniun.

Impurtont ei da saver, che las dunnas che han gia survegniu il commembradi d'honor, salvan quel e pagan aschia era vinavon negina contribuziun. Nus savein che quellas dunnas ein vegnidas da giuvnas ell'uniun ed han mess sillas combas ei. Aschia che quei dretg dueien ellas meritadamein era salvar.

Aschia propona la suprastanza da midar ils statuts sco sut numnau:

Artechel 3c - VEGL:

Commembras d'honor d'aventan dunnas che han cumplenu il 65avel anniversari e ch'ei silmeins dapi tschun onns commembras activas dall'uniun. Ellas ston buca pli pagar la contribuziun annuala.

Artechel 3c - NIEV:

Tenor conclus alla radunonza generala dils 5 da november 2023, vegn il commembradi d'honor annullaus. Commembras che han survegniu entochen la fin digl onn 2023 il commembradi d'honor salvan lez era vinavon. Ellas restan deliberadas dalla contribuziun annuala

La radunonza generala sedecida uanimamein da far la midada dils statuts sco sura numnau. La suprastanza engrazia per la fidonza. Ils statuts vegnan midai tenor decisiun e publicai sin la homepage.

9. Honoraziuns

Uonn astgan 3 dunnas prender encunter il matg fluras ed aschia d'aventar commembras d'honor. Seraina supplichescha las suandontas dunnas da vegnir anavon:

- Carlina Caviezel
- Rosina Derungs
- Barbara Rupp

Ad ellas in grond engraziament per tut la lavur fatga per l'uniun.

10. Elecziuns

Nossa cassiera Rita Arpagaus seretira ord la suprastanza. La presidenta legia avon la brev d'extrada che Rita ha surdau alla suprastanza. Ella engrazia a Rita da cor per tut sia lavur e siu engaschi per noss'uniun. Ella resta denton commembra dall'uniun e nus selegrein era vinavon sin bialas uras ensemen cun ella.

Sco gia informau alla davosa radunonza generala, ein Corinne Rietmann sco era Franzsika Räber sedeciaradas promptas dad entrar en la suprastanza. Avon che nus vegnin a menar atras las votaziuns damonda la presidenta, sch'ei dat aunc autras dunnas che havessan tschaffen da segidar.

Quei ei buca il cass, aschia che la presidenta semetta tier las votaziuns.

Tgi che less eleger Corinne Rietmann en suprastonza, duei far quei cun tener sil il maun. La radunonza elegia ella cun vusch unanima.

Tgi che less eleger Franziska Räber en suprastonza, duei far que cun tener sil il maun. La radunonza elegia era Franziska unanimamein en suprastonza.

Seraina informescha, ch'ellas vegnan elegidas per ina perioda d'uffeci da 3 onns. Franziska Räber surpren il post dalla cassiera e Corinne Rietmann sco suppleanta. Ella engrazia e selegra da luvrar cun ellas.

11. Varia

Mutaziuns:

Ei legra nus da saver beneventar 7 novas commembras ell'Uniun da dunnas, numnadamein:

Commembras novas

- Tina Liechti
- Franziska Caviezel
- Isabelle Schleiss
- Carolina Gauch
- Erna Minikus
- Lydia Kim Rybski
- Agnes Foppa

Extradas:

Uonn havein survegniu neginas extradas.

Commemoraziun per las commembras defunctas

Uonn havein stuiu prender cumiau da nossa commembra Clotilda Coray. Nus envidein ina candeila per ella e stein sin peis per in cuort silenzi.

Informaziuns Stefanie Kälin

Stefanie fa attenta sin la messa da laud che ha liug ils 19-11-2023. Uonn festivescha il uestg Joseph Maria Bonnamain la messa ed ei fagess grond plascher sche biaras prendessan part. Era meina ella atras seras da meditaziun cun ils curals da cardientscha. Ella envida tuttas da prender part als discuors ed il ruauss. Il december ha liug la devoziun d'advent tier il tema "La forza dallas Sentupadas". Igl ei negina messa e duei esser ina sentupada da meditaziun, cuminonza e buns patratgs. Sur Hanselmann vegn a festivar cun nus ed Albert Spescha ha organisau affons che sunan per nus. Era patertgein durant quella devoziun vid Clotilda Coray e tut nossas defunctas. Il davos engrazia ella aunc inagada per tut la lavur che l'uniun da dunnas fa e menziunescha aunc inagada il schubergiar la baselgia dils 29-11-2023.

Informaziuns Marita Buchli

Marita declara che signur Ralf Seelig terminescha sia davosa perioda d'uffeci en suprastonza dalla vischnaunca politica la primavera 2024. Perquei less ella far attenta e metter a cor a tuttas, da studegiar, sch'ina ni l'autra havess interess da surprender quella sfida. Igl ei in post fetg interessant nua ch'ins astga decider bia per la vischnaunca da Laax. Ella menziunescha, che mintgina che lavura bugen per la vischnaunca, vul formar cun il vitg e stat davos il vitg ei fetg adattada per quella lavur. Ella menziunescha tgei differents post ch'ei dat ella vischnaunca e ch'il post cumpeggia ca. 10% lavur. Mintgina che ha interess duei far da saver. Seigi cun tschintschar cun ella, ni cun Irina Beer-Killias ni semplamein da dar vinavon l'informaziun.

Era Irina Beer-Killias declara che quei fuss bi, sch'ina dunna vegness aunc en suprastonza. Ella pren era aunc la caschun dad engraziar a tuttas che han votau per ella alla radunonza dalla vischnaunca politica.

Informaziuns Babysitting

Silsuenter fa Seraina aunc attenta sin ina nova purschida cheu el vitg. Nadia Cathomas, che sa questa sera buca esser dalla partida, ha mess ensemen in flyer per il survetsch da babysitting. 3 mattatschas da Laax e Falera han fatg ils cuors da mirar dad affons ed havessan plascher da s'engaschar. Sch'enzatgi ha interessa, duei far aschi bien e s'annunziar tier Nadia Cathomas.

Diember da commemoras

Cun stan dad oz cumpeglia l'Uniun da dunnas Laax 89 commemoras activas e 47 commemoras d'honor, totalmein pia 136 commemoras, plus 10 commemoras passivas.

Mieds da comunicaziun

Seraina informescha aunc inagada sur dils mieds da comunicaziun. Ina varianta che nus vegnin el futur a duvrar dapli, ei la funcziun da questunari el whatsapp. Las damondas tschentadas san ins aschia rispunder cun sulettamein clicar sisu. Aschia vesa mintgina sin in'egliada sch'ei ha avunda dunnas che segidan ni san far pettas ni autras lavurs. Ella muossa leutier in exempel.

Era menziunescha ella, ch'igl invit ch'era vegnius per la radunonza per e-mail, hagi funzionau tier tuttas. Denton arvi buca adina ina nova pagina ed era il text da confirmaziun seigi buca adina vesibels, aschia eran certinas malsegiras sche l'annunzia hagi funcziunau. Percass ch'ei ha negin'annunzia el system, vegn Seraina a s'annunziar directamein tier la dunna pertuccada.

Autras damondas

Jessica Müller damonda sch'ei fuss pusseivel da far in cuors da romontsch per las mummas giuvnas. Natalia Gliott declara ch'ei detti gia purschidas tier la Lia Rumantscha ed era Vitus Dermont detti cuors da romontsch. Jessica engrazia per las informaziuns dat denton era da saver, che quellas purschidas seigien buca adina adattadas a lur giavischs. Seraina supplichescha ella da scriver si quell'idea sin nies Flipchart e tgi che havess interess duei far aschi bien e far in streh davostier. Aschia che nus savein en suprastonza discuorrer surdlunder.

En quei connex declara era Lydia Kim Rybski ch'ella fuss fetg engrazieivla per sustegn da romontsch. Ella seigi dalla hollandia e vegni ell'uniun per saver emprender era il lungatg.

Engraziament

La presidenta engrazia a tut las commemoras presentas per lur engaschi e lur lavur. Plinavon engrazia ella a sias treis consuprastontas Rita, Marlene e Sabrina.

Ella fa aunc inagada attenta ch'ins sa suenter radunonza pagar directamein ils frs. 20.00 alla cassiera. Quei pren gia giu bia lavur ad ella. Era las gliestas da sinscriver per lavurs ni era il Flipchart astgan vegni emplen.

Seraina Cathomen siara cun in citat la 74avla radunonza generala allas 20.30. Ella envida tuttas commemoras tier in pign puschegn ed in migiel vin.



Gemeinsam können wir viel erreichen

Euch allen ein  liches Dankeschön!!!!



Laax, 30 da november 2023

Per l'uniun da dunnas
l'actuara, Sabrina Camathias